

**REGIONAL NEWS UNIT
ALL INDIA RADIO, AGARTALA
Date: 13-04-2026
Time: 07:55-08:05 PM Hrs
BENGALI EVENING BULLETIN**

Headlines :

- (১) রাজ্য নির্বাচন কমিশনার এডিসি নির্বাচনে পেকুয়ারজলা-জন্মেজয়নগর কেন্দ্রের হীরাপুর এস.বি. স্কুল ভোটকেন্দ্রে পুনরায় ভোট গ্রহণের নির্দেশ দিয়েছেন।
- (২) প্রধানমন্ত্রী নরেন্দ্র মোদী বলেছেন, দেশের নারীশক্তি তাঁদের পরিশ্রম, সাহস ও আত্মবিশ্বাসের মাধ্যমে নতুন উচ্চতায় পৌঁছেছে।
- (৩) আগামীকাল চৈত্র সংক্রান্তি। ১৪৩২ বঙ্গাব্দের শেষ দিন। নতুন বছর ১৪৩৩ বঙ্গাব্দকে স্বাগত জানাতে প্রস্তুতি এখন ঘরে ঘরে।
- (৪) ত্রিপুরা ফুটবল এসোসিয়েশন পরিচালিত কাজল স্মৃতি ফুটবলে ত্রিপুরা স্পোর্টস স্কুল চ্যাম্পিয়ন হয়েছে।

Re-poll :

রাজ্য নির্বাচন কমিশনার এডিসি নির্বাচনে পেকুয়ারজলা-জন্মেজয়নগর কেন্দ্রের হীরাপুর এস.বি. স্কুল ভোটকেন্দ্রে পুনরায় ভোট গ্রহণের নির্দেশ দিয়েছেন। রাজ্য নির্বাচন কমিশন থেকে জানানো হয়েছে, রাজ্য নির্বাচন কমিশনার পেকুয়ারজলা-জন্মেজয়নগর আসনের হীরাপুর এস.বি. স্কুলের ভোটকেন্দ্রে ভোটগ্রহণ চলাকালীন সংঘটিত কিছু ঘটনার বিষয়ে গভীর গুরুত্ব সহকারে দৃষ্টিপাত করেছেন। নির্ভরযোগ্য ভিডিও প্রমাণ এবং পর্যবেক্ষকের পেশ করা রিপোর্টের ভিত্তিতে, প্রাথমিকভাবে এটি প্রমাণিত হয়েছে যে, কিছু ব্যক্তি ইভিএম-এ কারসাজি করে ভোটগ্রহণ প্রক্রিয়াকে কলুষিত করার দুরভিসন্ধিমূলক প্রচেষ্টা চালিয়েছিল; যার ফলে অবাধ ও সুষ্ঠু নির্বাচন প্রক্রিয়া ব্যাহত হওয়ার উপক্রম হয়েছিল।

কমিশন এই ধরনের কার্যকলাপকে অত্যন্ত গুরুত্বের সাথে বিবেচনা করছে। নির্বাচনী প্রক্রিয়ার অখণ্ডতা, স্বচ্ছতা এবং বিশ্বাসযোগ্যতা বজায় রাখা কমিশনের কাছে সর্বোপরি গুরুত্বপূর্ণ। সে কারনেই রাজ্য নির্বাচন কমিশনার আগামী ১৬ই এপ্রিল ওই ভোট কেন্দ্রে সকাল ৭টা থেকে বিকেল ৪টা পর্যন্ত পুনরায় ভোট গ্রহণের সিদ্ধান্ত নিয়েছেন।

Tourism Minister :

পর্যটন মন্ত্রী সুশান্ত চৌধুরী আজ রাণীরবাজারস্থিত পিএম-শ্রী রাণীগঞ্জ গার্লস হায়ার সেকেন্ডারি স্কুলের নতুন ভবনের ভিত্তিপ্রস্তর স্থাপন করেন। এটি নির্মাণে ব্যয় হবে ৮ কোটি ৫১ লক্ষ টাকা। এই কাজটি নির্দিষ্ট সময়ের মধ্যে গুণগত মান বজায় রেখে সম্পন্ন করার জন্য পর্যটন মন্ত্রী গ্রামোন্নয়ন দপ্তরের আধিকারিকদের নির্দেশ দেন।

Enrollment :

ত্রিপুরা হাইকোর্ট বার কাউন্সিলের উদ্যোগে আজ নবীন আইনজীবীদের সনদ প্রদান করা হয়েছে। বার কাউন্সিলের চেয়ারম্যান রতন দত্ত জানিয়েছেন, মোট ৬৪ জন নতুন আইনজীবীকে সনদ প্রদান করা হয়েছে। এই আইনজীবীরা এখন থেকে আদালতে প্র্যাকটিস করতে পারবেন।

PM :

প্রধানমন্ত্রী নরেন্দ্র মোদী বলেছেন, দেশের নারীশক্তি তাঁদের পরিশ্রম, সাহস ও আত্মবিশ্বাসের মাধ্যমে নতুন উচ্চতায় পৌঁছেছে। তিনি সবাইকে নারী ক্ষমতায়নের লক্ষ্যে আরও সুযোগ সৃষ্টি করতে একযোগে কাজ করার আহ্বান জানান। আজ নতুন দিল্লিতে ‘নারী শক্তি বন্দন সম্মেলন’-এ ভাষণ দিতে গিয়ে প্রধানমন্ত্রী শ্রী মোদী বলেন, নারী ক্ষমতায়নের উদ্দেশ্যে ২১শ শতাব্দীর

অন্যতম বড় সিদ্ধান্ত নিতে চলেছে ভারত। সংসদ এক নতুন ইতিহাস রচনার পথে, যা অতীত ও ভবিষ্যতের আকাঙ্ক্ষাকে পূরণ করবে। তিনি বলেন, গণতান্ত্রিক কাঠামোতে নারীদের জন্য সংরক্ষণ অত্যন্ত প্রয়োজনীয়, কারণ নারীদের অংশগ্রহণ দেশের গণতন্ত্রকে আরও শক্তিশালী করে। স্বাধীনতা সংগ্রাম থেকে সংবিধান সভার গুরুত্বপূর্ণ সিদ্ধান্ত পর্যন্ত-ভারতীয় নারীরা স্বাধীন ভারতের ভিত্তি গঠনে অসামান্য অবদান রেখেছেন। এখন একজন নারীর জন্মের মুহূর্ত থেকে শুরু করে তার সেবা ও ক্ষমতায়নে সরকার প্রতিশ্রুতিবদ্ধ।

#####Byte-PM-1#####

প্রধানমন্ত্রী আরো বলেন, রাষ্ট্রপতি থেকে প্রধানমন্ত্রী-যেখানেই নারীরা দায়িত্ব পালন করেছেন, সেখানেই তাঁরা নিজেদের স্বতন্ত্র পরিচয় গড়ে তুলেছেন এবং দেশের মর্যাদা ও গৌরব বৃদ্ধি করেছেন। প্রধানমন্ত্রী বলেন, পঞ্চায়েতি রাজ ব্যবস্থায় নারীদের নেতৃত্ব একটি উজ্জ্বল উদাহরণ। বর্তমানে দেশে ১৪ লক্ষেরও বেশি নারী স্থানীয় প্রশাসনে সফলভাবে দায়িত্ব পালন করছেন।

#####Byte-PM-2#####

Update Akashvani :

এখবর শুনছেন, আকাশবাণী আগরতলা কেন্দ্র থেকে।

#####Sound Byte#####

আকাশবাণীর সংবাদের আপডেট পেতে লগ ইন করুন - ডব্লিউ. ডব্লিউ. ডব্লিউ ডট নিউজ অন এ আই আর ডট কম এবং নিউজ অন এ-আই-আর অ্যাপ, এবং টুইটার ও ফেসবুক প্লাটফর্মে-এ এ-আই-আর-নিউজ-এলাটস-এ। ইউ-টিউব-এ লক্ষ্য করুন নিউজ-অন-এআইআর-অফিসিয়াল-এ।

এছাড়াও আকাশবাণী আগরতলার সংবাদ আপডেট পেতে দেখুন টুইটার বা এক্স হ্যান্ডলে আকাশবাণী নিউজ আগরতলা / ফেসবুকে এ-আই-আর নিউজ আগরতলা এবং ইউ টিউবে আকাশবাণী নিউজ আগরতলা।

Chaitra Sankranti :

আগামীকাল চৈত্র সংক্রান্তি। ১৪৩২ বঙ্গাব্দের শেষ দিন। নতুন বছর ১৪৩৩ বঙ্গাব্দকে স্বাগত জানাতে প্রস্তুতি এখন ঘরে ঘরে। এইদিনে চরক পূজা উৎসব, ঐতিহ্যবাহী মেলা এবং সাংস্কৃতিক আচার-অনুষ্ঠান অনুষ্ঠিত হয়। চাকমা সম্প্রদায় এটিকে বিজু হিসাবে উদযাপন করে। তাছাড়া বৈশু, সাংরাই এবং বিহু উৎসব ও অনুষ্ঠিত হয়।

মুখ্যমন্ত্রী অধ্যাপক ডাঃ মানিক সাহা চৈত্র সংক্রান্তি এবং বিজু ও বুইসু উৎসব উপলক্ষে সকল রাজ্যবাসীকে আন্তরিক অভিনন্দন ও শুভেচ্ছা জানিয়েছেন। শুভেচ্ছা বার্তায় তিনি বলেন, চিরাচরিত এইসব উৎসব উদযাপন চিরায়ত ঐতিহ্যের ধারায় জাতি-জনজাতি প্রত্যেকের নিজস্ব রীতিনীতি, ধর্মীয় বিশ্বাস, কৃষ্টি ও বর্ণময় সংস্কৃতির বিকাশের মাধ্যমে সম্প্রীতি ও একাত্মতা আরও সুদৃঢ় করে।

Voice Over-New Year Preparation :

দক্ষিণ জেলার মানুষের ঘরে ঘরে শুরু হয়েছে বর্ষবরণের প্রস্তুতি। আজ বাঙালিদের ফুল বিসু। পূর্বপুরুষদের বাসভূমি নোয়াখালী অঞ্চলের ঐতিহ্য মেনে প্রতিটি বাড়ির ছোট ছোট ছেলেমেয়েরা সকালে বেরিয়ে পড়ে ফুল কুড়োতে। এ নিয়ে একটি প্রতিবেদন।

#####VC#####

Defence Minister :

প্রতিরক্ষামন্ত্রী রাজনাথ সিং বলেছেন, গত কয়েক বছরে ক্রীড়াক্ষেত্রে ভারত উল্লেখযোগ্য সাফল্য অর্জন করেছে এবং গত ১১ বছরে দেশে খেলাধুলার ক্ষেত্রে এক নতুন যুগের সূচনা হয়েছে। আজ লখনউর কেডি সিং বাবু স্টেডিয়ামে তিন দিনব্যাপী সংসদ খেল মহাকুস্তের উদ্বোধন করে তিনি এই কথা বলেন। তিনি বলেন দেশে ক্রীড়া অবকাঠামো উন্নয়নে প্রায় ৫ হাজার কোটি টাকা ব্যয় করা হয়েছে। এর ফলে দেশের যুবসমাজের মধ্যে খেলাধুলাকে পেশা হিসেবে গ্রহণের আগ্রহ বেড়েছে।

Kajal Smriti Football :

ত্রিপুরা ফুটবল এসোসিয়েশন পরিচালিত কাজল স্মৃতি ফুটবলে ত্রিপুরা স্পোর্টস স্কুল চ্যাম্পিয়ন হয়েছে। উমাকান্ত মিনি স্টেডিয়ামে অনুষ্ঠিত আসরের ফাইনালে ত্রিপুরা স্পোর্টস স্কুল ৩-১ গোলে এস ডি এম স্কুল কোচিং সেন্টারকে হারিয়ে দেয়। ফাইনালের শেষে ট্রফি সহ চ্যাম্পিয়ন দলকে ১৫ হাজার টাকা ও রানার্স দলকে ১০ হাজার টাকা তুলে দেয়া হয়। অনুষ্ঠানে আগরতলা পুর নিগমের কর্পোরেটর তুমার কান্তি ভট্টাচার্য উপস্থিত ছিলেন।

T-20 Cricket :

ত্রিপুরা ক্রিকেট এসোসিয়েশন পরিচালিত সমীরণ চক্রবর্তী স্মৃতি ঘরোয়া টি-২০ ক্রিকেট প্রতিযোগিতার আজ ছয়টি খেলা হয়। এম বি বি স্টেডিয়ামে দুটি খেলায় শতদল সংঘ ১৫০ রানে বনমালিপুর ক্রিকেট ক্লাবকে এবং জয়নগর ক্রিকেট ক্লাব ৮ উইকেটে কসমোপলিটন ক্লাবকে পরাজিত করেছে। এছাড়া নরসিংগড়ের পিটিএ মাঠে দুটি খেলায় ওল্ড প্লে সেন্টার ৭ উইকেটে সংহতি ক্লাবকে এবং ব্লাডমাউথ ক্লাব ৯ উইকেটে পোলস্টার ক্লাবকে হারিয়ে দেয়। নরসিংগড়ের টি আই টি মাঠে দুটি খেলায় হার্ভে ক্লাব ৬১ রানে মৌচাক ক্লাবকে এবং স্কুলিঙ্গ ক্লাব ৭ উইকেটে চলমান সংঘকে পরাজিত করে।

Weather :

আগামী ২৪ ঘন্টায় রাজ্যের উত্তর জেলা, ধলাই জেলা ও ঊনকোটি জেলাতে ৩০ থেকে ৪০ কিলোমিটার বেগে ঝড়ো হাওয়া সহ বৃষ্টির সতর্কতা জারি করেছে আবহাওয়া দপ্তর। তাছাড়া বাকি জেলাগুলিতে বজ্র বিদ্যুৎ সহ বৃষ্টিপাতের সম্ভাবনা রয়েছে। আগামীকাল দিনের সর্বোচ্চ তাপমাত্রা ৩৫ ডিগ্রি সেলসিয়াস এবং সর্বনিম্ন ২৫ ডিগ্রি সেলসিয়াসের কাছাকাছি থাকতে পারে। আজ দিনের সর্বোচ্চ তাপমাত্রা ছিল ৩৫.২ ডিগ্রি সেলসিয়াস এবং সর্বনিম্ন ২৫.৪ ডিগ্রি সেলসিয়াস।
